

LISTOVI

GRAČANIČKI GLASNIK
časopis za kulturnu
historiju

Broj 47, godina XXIV
maj, 2019. [str. 193-202]

© Monos 2019

Listovi gračaničkog kalendara od 14. 11. 2018. – 7. 5. 2019.

Prof. dr. Omer Hamzić

14. 11. 2018.

Održana 24. sjednica Općinskog vijeća Gračanica: izmjenama Statuta općine regulisano da predsjedavajući Općinskog vijeća svoju dužnost može obavljati i volonterski i profesionalno...

...što će u svakom pojedinačnom slučaju utvrđivati Općinsko vijeće svojom posebnom odlukom. Osim ove, Statut je pretrpio i još neke manje izmjene u kojima se reguliše izbor vijeća mjesne zajednice, poštivanje polne zastupljenosti u radnim tijelima Općinskog vijeća itd. Iako se o tome dugo raspravljalo, sve je konačno usvojeni jednoglasno. Tako je prošla i Odluka o prodaji nepokretnosti neposrednom pogodbom kao i ispravka greške (!) u Odluci o izmjenama i dopunama Budžeta Općine Gračanica za 2018. godinu.

15. 11. 2018.

Raport iz “Širbegovića” za 2018.: rast prihoda veći za 20% u odnosu na prethodnu godinu...

...značajno je povećan obim proizvodnje, produktivnosti i kvaliteta proizvoda, što je rezultat ulaganja u proširenje kapaciteta i modernizaciju opreme u iznosu od preko 10 miliona KM tokom 2017. i 2018. godine. Tako su ispunjeni rigorozni uslovi za proširenje tržišta na Austriju i Njemačku kao i za jačanje pozicije Kompanije na tržištu BiH, Hrvatske, Srbije, Slovenije i Crne Gore. Povećanje produktivnosti i dalji rast plata zaposlenika sa ciljem da se očuva postojeća uposlenost od cca 400 radnika ostaje jedan od ključnih strateških ciljeva ove kompanije.

LISTOVI...

24. i 25. 11. 2018.

Dan državnosti BiH: svečana akademija, prigodni kulturno-zabavni programi, prijem za posljednja tri živa učesnika Narodnooslobodilačkog rata 1941-1945 sa područja općine Gračanica

Prvo je u organizaciji Sportskog saveza, 24. 11., objavljena tradicionalna šetnja na relaciji Gračanica – Vis pod sloganom “Moja domovina moj ponos”. Prije polaska, položeno je cvijeće na spomen-obilježja u gradskom parku a potom i na Centralnom spomen-obilježju. Više od simbolične geste bio je prijem posljednjih troje živih učesnika Narodnooslobodilačkog rata 1941-1945. sa područja općine Gračanica u Kabinetu Općinskog načelnika. Kako je utvrđeno u evidenciji Općinskog odbora SUBNOARA, riječ je o Ankici Stjepanović, Mehmedu Kruškiću i Hasibu Čamdžiću, kojima je načelnik Helić uručio skromne novčane nagrade i zahvalnice. Na Svečanoj akademiji prigodan referat posvećen ovom datumu podnio je Predsjedavajući općinskog vijeća, Nihad Krajinović, a kulturno-zabavni program pripremili izveli učenici Gimnazije “Dr. Mustafa Kamarić” i vokalni ansambl “Arabeske”. U sali Muzičke škole postavljena je i izložba likovnih radova učenika Mješovite srednje škole, a u BKC-u samostalna izložba fotografija Ahmeta Hukića, te promocija knjige “Hadžibeg” autora Kemala Čopre.

3. 12. 2018.

Obilježena 25. godišnjica formiranja 212. bosanske oslobodilačke brigade

Brigadu su činili borci iz Gračanice, Doboju Istoka i Lukavca, pa su prigodne svečanosti uz okupljanje preživjelih boraca, časove historije i polaganje cvijeća na centralna spomen obilježja organizovane u sve tri spomenute općine. Kako je rekao komandant Brigade Bahrija Džananović na svečanosti u Gračanici, prvo postrojavanje je obavljeno 1. 2. 1993. godine, a nakon toga je izvedena i

prva akcija u području ozrenske Orahovice. U trenutku formiranja brigada je imala u stroju 1200 boraca. Na spisku onih koji su se borili u njenim tedovima tokom rata nalazi se oko 2500 imena. Ukupni gubici brigade su 87 poginulih i preko 700 teže i lakše ranjenih. Pored Bahrije Džananovića, prisutnima se obratio i borac Kemal Skopljak. (Radio Gračanica)

13. 12. 2019.

Promocija 46. broja “Gračaničkog glasnika”...

...organizovana je u prostorijama Narodne biblioteke “dr. Mustafa Kamarić” u prisustvu novinara, jednog broja prijatelja i saradnika Časopisa, te grupe učenika gračaničke Gimnazije “Dr. Mustafa Kamarić”.

Obrazlažući temu broja (*140. godišnjica od početka i 100. godišnjica od završetka austrougarske uprave u Bosni i Hercegovini i nastanka Kraljevine SHS, 1918. godine*), prof. dr. Omer Hamzić, glavni i odgovorni urednik Časopisa, podsjetio je na više detalja o odbrani Gračanice, tokom austrougarske okupacije, 1878., te smjeni austrougarske vlasti i “prevratu” u Gračanici 1918. godine. Posebno se zadržao na pisanju “Gračaničkog glasnika” o prilikama Gračanici u periodu austrougarske uprave, izdvojivši autentično svjedočenje jednog od učesnika borbi oko Gračanice između branilaca i okupacionih trupa koje je objavljeno u ovom broju. (Davorin Muršec Živkov, *Nesretni dani generala Szaspanyja u Bosni*). Iznio je takođe neke detalje iz svog članka o političkim napetostima između Srba i Muslimana u Gračanici u toku primopredaje vlasti posljednjeg kotarskog predstojnika Abdulselam-bega Hrasnice, novoimenovanom kotarskom predstojniku Ivanu Berničeviću, uz koji se objavljuje i faksimil zapisnika o spomenutoj primopredaji vlasti u Gračanici. U nastavku je mr. sc. Rusmir Djedović, predstavio svoj prilog u kojem je obradio neka sačuvana kazivanja starijih Gračanlija. Posebno je istakao zna-

čaj usmenih kazivanja (oralne historije) kao značajnog izvora saznanja o našoj prošlosti, pogotovo o onim događajima o kojima nema drugih izvora. Na kraju je obavijestio prisutne o uspješnom predstavljanju "Gračaničkog glasnika" na naučnom skupu povodom 35. godišnjice Zavoda za zaštitu kulturno-historijskog i prirodnog naslijeđa TK, koji je nedavno održan u Tuzli.

14. 12. 2018.

Gračanički fotograf Hasan Puškar – Soha osvojio dvije prestižne nagrade na 12-tom međunarodnom salonu fotografije Univerzitetskog foto-kino kluba Banja Luka

Salon je organizovan u Banskim dvorima u Banja Luci, uz učešće renomiranih umjetničkih fotografa iz preko 50 zemalja cijelog svijeta. U zaista žestokoj konkurenciji Puškar je osvojio IAAP-ov (International association of art photographers) blue ribbon za monochrome fotografiju "Escort". Druga nagrada, ništa manje značajna je Prvo mjesto za monochrome fotografiju "Foto BiH 2018", za fotografiju "Čovjek i cipele". I njegova kćerka Emina krenula je očevim stopama. Tokom 2018. osvojila je takođe veliki broj nagrada i priznanja na svjetskoj i domaćoj fotografskoj sceni.

20. 12. 2018.

"Glas TK": održana manifestacija "Lider biznisa TK 2018" – u konkurenciji od oko 50 kompanija 6 je iz Gračanice

Stručni žiri je za lidere odabrao one koji su svojim radom i asortimanom proizvoda privukli pažnju tržišta i dali poseban doprinos privrednom razvoju Tuzlanskog kantona. Priznanja su dodijeljena kompanijama iz različitih oblasti: građevinarstva i proizvodnje, uslužnih djelatnosti, prehrambene industrije i obrtnih djelatnosti. Prema odluci Žirija "Lideri biznisa 2018." iz oblasti proizvodnje i građevinarstva, energetike i rudarstva su:

"Bosfor stil" d.o.o Živinice, "Profine BH" d.o.o Živinice, "Sisecam soda" doo Lukavac, "Gradmont" d.o.o Gradačac, "Rile promet" d.o.o Kalesija, "Trgovir" d.o.o Gračanica, "Euro-galant" d.o.o Gračanica, "Plamingo" d.o.o Gračanica, "Rpc Superfos" d.o.o Gračanica; "Lider biznisa 2018." u *uslužnim djelatnostima*, po procjeni stručnog žirija su: "Zux-4" d.o.o. Kalesija i JP "Vodovod i kanalizacija" Gračanica; Priznaje "Lider biznisa 2018." u kategoriji *prehrambene industrije* dodijeljeno je: "Swity" d.o.o Gradačac, a za oblast obrtne djelatnosti Pekari "Kabil", vl. Kabil Mustafa, Tuzla; Među 6 nosilaca priznanja "Turistička zvijezda 2018.", koje dodjeljuje Turistička zajednica TK nalazi se i Hotel "Sax" Gračanica.

26. 12. 2018.

Izbor sportiste godine u Gračanici za 2018. godinu: za najbolje proglašeni Šejma Duraković, članica Karate kluba Gračanica i Dino Hamidović, igrač RK Gračanica

Za najbolje *sportske kolektive* proglašeni su ŽOK Gračanica "Fortex" i RK "Gračanica". *Najuspješniji juniori* su Adna Kamarić iz ŽOK "Gračanica" i Namik Helić nogometaš iz NK "Bratstvo". *Najbolji kadeti* su Azer Musić (RK "Gračanica") i Mubina Rešidbegović (Karate klub). U *pionirskoj konkurenciji* nagrade su dobili Anela Letic iz Šahovskog kluba "Gračanica" i Emir Džaferović iz Judo kluba "Pribava" Nagradu za *najboljeg trenera* dobio je Ferik Dizdarević, dok je *najbolji sportski radnik* ove godine Mirzet Topčagić, oba iz MNK "Kaskade". Specijalna priznanja za *doprinos u razvoju sporta* dobili su Planinarsko društvo "Zefir", te novinari Fahrudin Kurtović i Adnan Džafo. Za *najbolju osnovnu školu* je proglašena Druga osnovna, a za *najbolju srednju školu* Mješovita srednja škola. Priznanja su dodijeljena *nastavniku tjelesnog odgoja* Šefiku Memiću i profesoru Almiru Devedžiću. *Posthumna priznanja* su dobili Đuka Kamarić, Borislav Žuža, Ah-

met Šelo i Slobodan Jovanović. (izvor: Radio Gračanica)

27. 12. 2018.

Održana 25. sjednica Općinskog vijeća Gračanica: Budžet za 2019. i ostalo manje važno

Na predloženi Nacrt budžeta bilo je preko 30 amandmana, neki su usvojeni, neki djelimično usvojeni a neki su odbijeni. Budžet je usvojen u visini od 15.746.162 KM što je u odnosu na Nacrt više za 3.002.128 KM. 15.746.162 KM. Jednoglasno je nakon kraće diskusije usvojena i odluka o načinu izvršenja Budžeta, te Program rada Općinskog vijeća za 2019.godinu... Razmatrani su i usvojeni prijedlozi nekoliko odluka, među kojima izdvajamo: odluku o pristupanju izradi izmjena i dopuna Regulacionog plana "Centar", o uspostavljanju mehanizma komunikacije vijećnika sa građanima – Građanski sat, o prijenosu prava vlasništva na nekretninama, o osnivanju Turističke zajednica Općine Gračanica, o prestanku i dodjeli mandata članovima vijeća mjesnih zajednica Donja Orahovića, Vranovići, Miričina, Lendići i Lukavica. Takođe je razmatrano nekoliko rješenja i razrješenja članova upravnih i nadzornih odbora javnih ustanova i preduzeća: "Veterinarska stanica", "Dom zdravlja", "Gradska apoteka" i "Vodovod i kanalizacija". gračanica. K znanju su primljene i informacije o upravljanju parking prostorom, o stanju i popunjenosti izbjegličkih naselja na području općine Gračanica, o realizaciji projekta harmonizacije katastarskih i zemljišnoknjižnih podataka za 8. fazu Projekta registracije nekretnina, te o uklanjanju neeksplozivnih sredstava na području općine Gračanica u 2018. godini.

28. 12. 2018.

Otvoren 3. po redu Zimski bazar u centru Gračanice...

...na kojem su se sa svojim rukotvorinama proizvodima predstavile članice iz nekoliko

udruženja žena sa područja općine Gračanica i Doboj Istok. U revijalno-zabavnom dijelu programa nastupili su učenici Druge osnovne škole, Osnovne škole "Hasan Kikić", učesnici ovogodišnjeg takmičenja Gračaničke zvjezdice te gračanički srednjoškolski, koji su na istom mjestu uzeli učešća i u obilježavanju dječje Nove godine (Radio Gračanica)

7. 1. 2018.

Osnovne i srednje škole u Gračanici, po ostvarenom uspjehu u gornjem dijelu rang-liste na Tuzlanskom kantonu

Prema **preliminarnim rezultatima vrednovanja rada osnovnih i srednjih škola Tuzlanskog kantona** u školskoj 2017/18. godini, koje je objavio Pedagoški zavod u Tuzli, prvo mjesto ponovo je osvojila Behram-begova medresa Tuzla sa ostvarenih 6325 bodova. Druga je MSS Gradačac (6262 boda), a treća MSS Gračanica (5142), dok je Gimnazija "Dr. Mustafa Kamarić" Gračanica zauzela 9. mjesto. U ukupnom poredku gimnazija, gračanička je zauzela 3. mjesto, dok je u ukupnom poredku mješovitih i drugih srednjih škola MSS Gračanica zauzela drugo mjesto. U rangu osnovnih škola, najuspješnija škola sa gračaničke općine je OŠ "Hasan Kikić" koja je zauzela 4. mjesto (Gračanički. ba)

10. – 12. 1. 2019.

Zimska škola – "Winter school & fest"...

...jedinstveni je trodnevni program neformalnog obrazovanja o aktivizmu mladih, liderstvu, komunikaciji i javnom nastupu u Bosni i Hercegovini, kojeg već drugu godinu zaredom organizuje Vijeće mladih Općine Gračanica. Ciljna grupa ovog projekta bili su učenici srednjih škola i studenti, koji su imali priliku da kroz osam različitih programa i tematskih radionica steknu nova znanja, vještine i sposobnosti. Ove godine, učenici

i studenti su birali između kursa amaterske arheologije, osnova web programiranja, građanskog aktivizma i izrade projektnih aplikacija, samoodbrane i borilačkih vještina, tradicionalnih narodnih igara i folklor, kurseva fotografije i crtanja, te prezentacije AFS interkulturalnog učenja. Zimska škola je realizovana na osam različitih lokacija u Gračanici, uz osiguranu hranu i putne troškove za sve učesnike.

25. 1. 2019.

Promocija filma “Istorija gračaničkog rukometa”, autora Dževada Muderizovića...

...obavljena je u Velikoj sali Bosanskog kulturnog centra u prisustvu mnogobrojnih ljubitelja sporta i veterana gračaničkog rukometa, koji su se podsjetili na velike rezultate ove grane sporta u Gračanici. Film je rađen iz dva dijela od po cca 70 minuta, a u filmu se pojavljuje i govori 25 bivših igrača, trenera i članova uprave.

29. 1. 2019.

Bivši radnici “Fortune” (u stečaju), pokušat će ponovo pokrenuti proizvodnju u svojoj fabrici

To je odluka Skupštine povjeritelja na kojoj je konačno formiran i Odbor povjeritelja, a najavljena je i inicijativa za smjenu stečajnog upravnika. Vrijednost “Fortune” procijenjena je na oko 11 miliona KM, a njena dugovanja na čak 55 miliona KM. Bivši radnici, za razliku od stečajnog upravitelja, smatraju da rješenje problema nije prodaja firme nego njeno oživljavanje (federalna.ba)

30. 1. 2019.

Održana 26. sjednica Općinskog vijeća Gračanica: izvještaji, izvještaji...

Nakon usvajanja Prijedloga Odluke o privremenom korištenju javnih površina, Odluke o visini naknade za zakup javnih površina radi postavljanja privremenih objekata, te

Odluke o prijenosu prava vlasništva na nekretnini licu čiji je stambeni objekat uništen djelovanjem prirodnih nepogoda, u izvještajnom dijelu sjednice, bez veće rasprave, usvojeni su izvještaji o radu u prethodnoj godini: Općinskog vijeća Gračanica i radnih tijela (komisija), o rješavanju upravnih stvari u upravnom postupku u službama za upravu Općine Gračanica, o izvršenim procjenama prometa nepokretnosti i prava i o izvršenim mjerenjima zadovoljstva građana javnim uslugama i radu Općinskog vijeća. Općinski načelnik je informisao vijećnike o sadržaju svog programa rada u 2019. godini. nakon čega je razmatran Izvještaj o radu Općinskog vijeća Gračanica i radnih tijela (komisija) u 2018. godini.

27. 2. 2018.

Održana 27. sjednica Općinskog vijeća Gračanica: predsjedavajući– profesionalna funkcija ipak...

Dugotrajno natezanje oko toga okončano je usvajanjem Odluke o statusu Predsjedavajućeg i zamjenika predsjedavajućeg Općinskog vijeća Odluka je sa 18 glasova za, 6 protiv i 5 suzdržanih. Druga tačka dnevnog reda bila je “Razmatranje i usvajanje Nacrta Odluke o visini naknade predsjednicima vijeća mjesnih zajednica”. I ova Odluka je izazvala žestoku raspravu vijećnika ali je Nacrt usvojen sa 27 glasova za i 2 suzdržana, uz Zaključak da se o njoj provede javna rasprava u trajanju od 60 dana. Na javnu raspravu, za koju je takođe predviđeno 60 dana, upućeni su i nacrti odluka o komunalnom redu i o komunalnim djelatnostima. Jednoglasno je usvojen i Izvještaj o radu Općinskog načelnika u 2018. godini.

Potom je razmatrano i usvojeno i nekoliko informacija: o stanju isporuke toplotne energije iz gradske toplane, o stanju zaštite od požara i vatrogastva, praćenja i izvršenja Plana zaštite od požara na području općine Gračanica u 2018. godini, o dodjeli stipendija učenicima srednjih škola i studentima za školsku

2018/2019. godinu i o stanju bezbjednosti na području općine Gračanica. Na kraju je prezentiran i Elaborat o opravdanosti izdvajanja odjeljenja Paralelne osnovne muzičke škole u Javnu ustanovu osnovna Muzička škola Gračanica za što su vijećnici dali punu podršku.

6. 3. 2018.

Malo statistike: Gračanica u grupi općina s najnižim prosječnim plaćama u BiH

Troškovi života u BiH rastu iz godine u godinu. Samo za posljednjih godinu dana prehrambene namirnice su poskupile za 80 posto, a potrošačka korpa dostigla za mnoge nedostižnih 2.000 KM. Tako većina porodica u ovoj zemlji, i pored nedavnog povećanja plata, jedva sastavlja kraj s krajem. Pritom, cijene i primanja variraju od općine do općine i od grada do grada, pa je u nekim dijelovima ovaj nesklad između primanja i potrošnje još veći.

Prema podacima koje je objavio Zavod za statistiku Republike Srpske, vidljivo je da su najveće plate u ovom entitetu isplaćivane u opštinama koje imaju rudnike, termo i hidroelektrane, te šume. Tako se u ovom entitetu najveća prosječna plata zarađuje u Stanarima, oko 1.180 KM, zatim u Ugljeviku, 1.135 KM, dok je na trećem mjestu Gacko sa 997 maraka. Platu veću od prosjeka zarađuju i Banjalučani 958 KM, te građani Istočnog Drvara 923 marke. Na dnu liste su Kostajnica sa 650 KM, Teslić sa 628 KM, Jezero sa 571 KM, Donji Žabar sa 564 KM, a najniža primanja imaju građani Kupresa–505 KM.

Što se tiče iznosa prosječnih neto plata u Federaciji BiH, posljednji podaci Federalnog zavoda za statistiku pokazuju da se osam opština ili jedva njih 10% u FBiH može pohvaliti da ima prosječnu platu iznad 1.000 KM. Tako je najveća prosječna neto plata isplaćena u općini Centar Sarajevo u iznosu od 1.281 KM i u općini Novo Sarajevo 1.205 KM. Nakon ove dvije sarajevske općine slijedi Ravno (1.141 KM), općina Bosansko

Grahovo (1.072 KM), Mostar (1.071 KM), općina Dobretići (1.071 KM), općina Stari Grad Sarajevo (1.056 KM) i općina Kakanj (1.012 KM). Na drugoj strani, najnižu isplaćenu neto platu imaju općne Doboj-Istok (565 KM), Domaljevac-Šamac (587 KM), Olovo (601 KM), Tešanj (605 KM), Žepče (616 KM), Bugojno (621 KM), Visoko (634 KM), Čitluk (649 KM) i Gračanica–656 KM. (Gračanički.ba)

22. 3. 2018.

Atletičar Hasan Sejdinović donio u Gračanicu Zlatnu medalju sa Specijalne olimpijade u Abu Dabiju – organizovan doček za svjetskog prvaka...

Riječ je njegovom sjajnom nastupu na ljetnim olimpijskim igrama "Specijalne olimpijade" koja je ove godine održana od 8. do 22. marta u Abu Dabiju. Atletičar Hasan Sejdinović je 17. 3., u utrci na 200 metara, osvojio prvo mjesto i tako našoj zemlji donio prvo zlato na ovogodišnjim ljetnim igrama. Ovo takmičenje je, inače, u rangu globalnih sportskih događaja kao što su Olimpijske i Paroolimpijske igre. Na njemu je ove godine nastupilo oko 7.000 učesnika iz 170 nacionalnih timova, među kojima je bila i ekipa Bosne i Hercegovine (33 člana, od čega 18 takmičara, 6 trenera, 1 doktor i predvodnici delegacije). Za gračaničkog šampiona organizovan je svečani doček ispred zgrade općine na kojem su se okupili brojni građani, sportisti i njegovi školski drugovi da mu čestitaju i podijele radost sportskog uspjeha. Nakon prigodnih obraćanja uručeni su prigodni pokloni za Hasana i njegovu majku od Organizacije RVI Gračanica, MZ Džakule, JU Centra za socijalni rad, Osnovne škole "Hasan Kikić", Sportskog saveza općine Gračanica, Hasanov razred IX-1 te načelnika Općine Nusreta Helića.

26. 3. 2019.

Na Ahiret preselio “Zlatni ljiljan” Habib Hadžić Habibčić...

...natporučnik Armije RBiH, nekadašnji komandir 3. čete 212. oslobodilačke brigade, jedan od petnaestorice Gračanlija – nosilaca ratnog priznanja koje se dodjeljivalo pojedincima koji su se “*naročito istakli u oružanom suprostavljanju agresoru, doprinijeli proširenju slobodnih teritorija, te izvršili više djela u kojima je došla do izražaja njihova lična hrabrost i požrtvovanje, pri čemu su agresoru naneseni znatni gubici...*” (četvorici od njih priznanje je dodijeljeno posthumno).

Rodom iz Klokočnice, po zanimanju je bio autoelektričar, a vojni rok u JNA odslužio je u elitnim “Niškim specijalcima”. Uoči raspada Jugoslavije živio je i radio u Sloveniji, nakon čega se, 1991. godine, priključuje odbrani Hrvatske. “*Boriće se hrabro i nesebično*”, zapisao je ratni reporter u listu 212. brigade, “*što mu je donijelo tri ranjavanja do njegovog dolaska u Bosnu. U martu ‘92. dovodi specijalnu jedinicu iz Siska u odbranu Bosanskog Broda. Sa svojom ekipom, koja je imala radni naziv “handžarci”, zarobio je prvih pet tenkova i oslobodio Lješće. Potom dolazi na područje opštine Gračanica, tačnije u Lukavicu, gdje zatiče sjajne momke spremne da se bore, ali oružja je bilo premalo ili bolje reći nikako. Tu je poduzeo aktivnosti na naoružavanju i uvojničavanju naroda, stavljajući se na čelo interventne jedinice koja je dala značajnog udjela u odbrani ovog mjesta, koje je jedno od mjesta na koje se sručilo najviše granata na tako malom prostoru.*”

S osnivanjem 212. oslobodilačke brigade prelazi u ovu jedinicu, gdje preuzima dužnost komandira čete. Sa svojom 3. četom posebno se istakao u oslobađanju Vijenca (11. 05. 1994.), a zatim i Visa (12. 08. 1992.), kao i u drugim borbama koje je ova brigada vodila. Ratno priznanje “Zlatni ljiljan” uručeno mu je u oktobru 1994. godine.

Ovaj svijet je napustio prerano, u 55. godini života.

29. 3. 2019.

U Zavičajnoj zbirci Gračanica otvorena izložba fotografija Univerzitetskog foto-kino kluba Banja Luka

Riječ je o jednom od najboljih foto klubova u Evropi, o čemu govori i činjenica da su za 2018. godinu dobili Srebrnu medalju od FIAP-a (Svjetske asocijacije za njegovanje i razvoj umjetničke fotografije). Izložbu je otvorio Nihad Krajinović, predsjedavajući OV Gračanica, a prisutnima su se obratili i Hasan Puškar Soha, predsjednik foto kluba Gračanica i Milorad Kašćevan, predsjednik Univerzitetskog foto-kino kluba Banja Luka. (Gračanički.ba)

29. 3. 2019.

Održana 28. sjednica Općinskog vijeća: Budžet – pogled na prošlu godinu, podbačaj u realizaciji grantova za kapitalna ulaganja iz Budžeta TK

Inače, planirani Budžet u prošloj godini iznosio je 13.889.721 KM. “Najmanje ostvarenje je na grantovima, svega 36,53%, uglavnom se odnosi na kapitalne grantove. Sve su to planirani grantovi od Kantona i za njih su donešene odgovarajuće odluke”, rekao je u svom obrazloženju Općinski načelnik. Vijećnici su se očitovali i o Akcionom planu energetske održivog razvoja i klimatskih promjena. Isto tako, izjasnili su se da ne treba vršiti povećanje naknada u upravnim odborima javnih preduzeća. Data je i podrška planovima upisa učenika u prve razrede u Gimnaziji “Dr. Mustafa Kamarić” i Mješovitoj srednjoj školi u narednoj školskoj godini, uz preporuku da se pri formiranju odjeljenja i smjerova vodi više računa o tržištu rada. Uz izrečene pohvale, prihvaćeni su izvještaji o radu javnih ustanova za prošlu godinu – Centar za socijalni rad, Bosanski kulturni centar i Dječije obdanište “Naša djeca”.

31. 3. 2019.

Predstavljen prvi detaljan virtualni prikaz ulica (Street View) u Gračanici, uz interaktivnu mapu koja prezentuje objekte od privrednog, investicionog, kulturnog i turističkog značaja

“Realizacija ovog projekta će omogućiti kvalitetniju ponudu informacija koje omogućavaju olakšanu orijentaciju i filtriranje svih relevantnih informacija u svrhu unapređenja promocije objekata od privrednog, investicionog, kulturnog i turističkog značaja u općini Gračanica”, istakao je načelnik općine Gračanica, Nusret Helić. Nakon virtualnog prikaza ulica, najavljena je i izrada virtualnog arhiva tako da će općina Gračanica u tome biti prva u Bosni i Hercegovini. U mnogim svjetskim gradovima, kako je rečeno, izrada rješenja za pametne gradove (Smart City) postaje važan segment svih strategija i promišljanja o budućem razvoju. (RTV Slon)

1.4. 2019.

Nije šala: Gračanica postala grad

Pod tim naslovom i pod tim datumom, na službenoj veb stranici općine (a od sada-grada) objavljena je informacija da je na prvoj sjednici Doma naroda Parlamenta Federacije Bosne i Hercegovine, održanoj 01.04.2019. godine, po skraćenom postupku usvojen Prijedlog Zakona o Gradu Gračanica (kao i o još nekoliko gradova, koji su do sada bili općine). Inače, prema spomenutom zakonu, općina i grad kao jedinice lokalne samouprave imaju iste nadležnosti, prava i obveze (pa i teritoriju). Međutim, stjecanjem statusa grada, kako se tvrdi u spomenutoj informaciji, jedinice lokalne samouprave dobivaju na većem značaju u odnosima prema domaćim, ali i međunarodnim organizacijama i partnerima.

3. 4. 2019.

“Širbegović” armirano betonska konstrukcija na najvećem

regionalnom tržišnom centru Belgrade Waterfront Galerija, Beograd,

...naslov je o jednom u nizu ovogodišnjih poduhvata ove kompanije, objavljen na njenoj službeno stranici. Inače, radi se o najvećem regionalnom tržišnom centru, koji će nakon završetka postati ključna maloprodajna, zabavna i destinacija za provođenje slobodnog vremena. Karakteriše je inovativni dizajn i bogata ponuda kreirana na bazi jedinstvenog šoping iskustva i dinamičnog životnog stila koji se fokusira na prodavnice, kafiće, restorane i zabavu. Objekat se gradi na jednoj od najpristupačnijih lokacija u gradu, na samo 15 minuta vožnje od aerodroma, ima direktan pristup autoputu, lociran je na samo 2 kilometra udaljenosti od nove poslovne četvrti i 500 metara od centralne beogradske stanice, u blizini historijskog centra grada. U svakom slučaju, još jedna uspješna poslovna referenca gračaničke građevinske kompanije “Širbegović»-

7. 4. 2019.

Povodom 7. aprila, Dana oslobođenja Gračanice u Drugom svjetskom ratu premijerno prikazan dokumentarni film pod naslovom “Gračanički pravednici”

Medalja “Pravednici među narodima”, 29. maja 2018. godine, posthumno je dodijeljena dr. Avdi Prohiću iz Gračanice, njegovoj majci Esmi, te bratu Sabriji i Sabrijinoj supruzi Safeti—za sve što su učinili da bi spasili jevrejsku djevojčicu, Nadu Kolman, kćerkicu gračaničkog apotekara Viktora Kolmana i njegove supruge Helene, sa kojima je dr. Avdo Prohić bio kućni prijatelj. Riječ je o priznanju koje se, na prijedlog Memorijalnog centra Yad Vashem i po odluci posebno imenovane komisije Ustavnog suda Izraela, dodjeljuje osobama, pripadnicima drugih naroda, koje su spašavale Jevreje tokom Holokausta, rizikujući i vlastiti život.

Zahvaljujući dr. Prohiću i njegovoj porodici, Nada Kolman je preživjela Holokaust –

nacistički genocid i najstrašniji masovni zločin u modernoj povijesti, u kojem je stradalo i devetero Jevreja – tadašnjih žitelja Gračanice, kao i još dvadesetak njihovih sunarodnika, rođenih u Gračanici, koje je zla sudbina zatekla u drugim mjestima. Prikazani dokumentarni film “Pravednici među narodima” je priča ne samo o dodjeli tog priznanja, već i o sudbini Jevreja u Gračanici tokom Drugog svjetskog rata, zasnovana na dosadašnjim istraživanjima prof. dr. Omera Hamzića, mr. Edina Šakovića i Rejhana Prohića koji su i bili saradnici na filmu, čiji je autor Fahrudin Kurtović iz Gračanice.

19. 4. 2019.

Deseti jubilarni Sajam obrta i poduzetništva “Grapos expo” u Gračanici...

...ove godine održan je na 11.000 kvadratnih metara zatvorenog i 6.000 kvadrata otvorenog prostora u Poslovnoj zoni “Fering” u Gračanici. Nastupilo je više od 330 izlagača iz Bosne i Hercegovine, Hrvatske, Slovenije, Austrije, Njemačke, Švedske i drugih zemalja, pa se po tome ovaj sajam smatra u toj kategoriji najvećim u regionu. Tokom trajanja Sajma, od 16. do 19. aprila, sajamsku izložbu obišlo je više hiljada posjetilaca. Prema ocjeni organizatora, Sajam je u potpunosti ispunio očekivanja, pa su već počeli pripremati sljedeći, 11. po redu... Na otvaranju sajma pojavili su se kantonalni i lokalni dužnosnici. Vlada TK je, inače, pokrovitelj Sajma. .

26. 4. 2018.

Umro prof. dr. Salih Jalimam – prof. Pravnog fakulteta u Zenici

Rođen je u Zenici 30. 9. 1951. godine, osnovnu školu i gimnaziju završio je u rodnom gradu, a Filozofskom fakultetu (Odsjek historija) u Sarajevu, 1975. na kojem je i magistrirao, 1982. godine. Doktorsku disertaciju pod naslovom “Djelatnost dominikana u srednjovjekovnoj Bosni” odbranio je na Filozofskom fakultetu u Tuzli 1998. Radio

je u osnovnoj i srednjoj školi, Muzeju grada Zenice i u Centru vojnih škola Armije RBiH. Predavao je srednjovjekovnu historiju na Filozofskom fakultetu u Tuzli, Pedagoškom fakultetu u Bihaću, Fakultetu humanističkih nauka u Mostaru i Pedagoškom fakultetu u Zenici. Od 1. oktobra 2005. je bio angažovan na Pravnom fakultetu Univerziteta u Zenici na katedri: Historija države i prava Bosne i Hercegovine. Bio je dekan Pravnog fakulteta u Zenici i šef katedre historije države i prava i Predsjednik vijeća postdiplomskog studija na Pravnom fakultetu u Zenici (do kraja 2009). U nastavno-naučno zvanje redovni profesor za naučnu oblast: Historijske nauke izabran je početkom 2011. godine. Bio je član redakcije i saradnik nekoliko naučnih i stručnih časopisa: “Godišnjak Društva historičara BiH”, “Gračanički glasnik” i “Stav” u Tuzli, te glavni i odgovorni urednik Zbornika radova Pedagoškog fakulteta i Časopisa “Društvena istraživanja”.

Najbolje rezultate u svojoj naučnoj oblasti ostvario je na polju vjerskih prilika u srednjovjekovnoj Bosni, te u lokalnoj historiji Zenice. Učestvovao je sa referatima na više međunarodnih naučnih skupova i konferencija. Iz njegove bogate bibliografije izdvajamo samo nekoliko naslova: *Bibliografija radova o istoriji Zenice*, Zenica 1985., *Vranduk-grad i utvrda*, Zenica 1990., *Putopisne bilješke i zapisi o zeničkom kraju*, Zenica 1991., *Izvori za istoriju srednjovjekovne bosanske države*, Tuzla, 1997., *Historija bosanskih bogomila*. Tuzla, 1999., *Dominikanci u Bosni u srednjem vijeku*, Tuzla, 2009, *Historija Zenice*, 2009., *Kulturna povijest Bosne i Hercegovine*, Zenica, 2013

Komemoracija povodom smrti prof. Jalimama održana je na Filozofskom fakultetu u Zenici 28. 4., kada je i ukopan na gradskom groblju Prašnice.

29. 4. 2019.

Održana 29. sjednica Općinskog vijeća Gračanica: ostvarenje Budžeta

za prva tri mjeseca i općinska priznanja za 2019. godinu...

...zaokupila su najviše pažnje vijećnika na ovoj sjednici. Premda je Budžet dobrodo planiran, kako je rekao općinski načelni Nusret Helić, poremećaji su uzrokovani slabijim prilivom sredstava sa viših nivoa vlasti za kapitalne projekte. Ostale tačke vijećnici su "odradili" rutinski. Riječ je o tri izvještaja o radu i finansijskom poslovanju sa bilansom stanja za 2018. tri gračaničke javne ustanove: Dom zdravlja, Gradska apoteka i Veterinarska stanica. Na dnevnom redu su bile i tri informacije: o radu Općinskog suda u 2018., o higijensko-epidemiološkoj situaciji na opštini i zbrinjavanju pasa lualica...Vijeće se bavilo i nekim kadrovskim pitanjima iz svoje nadležnosti. Tako je za općinskog pravobranioca ponovo imenovana Jasminka Imširović.

7. 5. 2019.

Među 20 TOP kompanija na TK, po rezultatima ostvarenim u 2018.

godine, nalaze se i tri kompanije iz Gračanice: "Motorex", "Index" i "Trgovir".

Prema podacima dostupnim na portalu "Akata.ba", broj kompanija iz FBiH koje su predale finansijski izvještaj za 2018. godinu je 22.952, od toga je 3.087 iz Tuzlanskog kantona. Te su kompanije ostvarile prihod od 7,5 milijardi KM dok je njihova dobit iznosila 455 miliona KM. Spomenute kompanije zapošljavaju prosječno 67.896 radnika. Među TOP 20 kompanija TK prvo mjesto po ostvarenoj dobiti zauzeo je BINGO sa 76 miliona. Treća na listi je gračanička kompanija Motorex sa 13 miliona a na 9. mjestu je firma Index sa 4 miliona.

BINGO je zauzeo i prvo mjesto kada je riječ o ostvarenom ukupnom prihodu koji iznosi 1,1 milijardu KM. Na ovoj listi se nalaze dvije gračaničke kompanije, Motorex sa 48 miliona prihoda i Trgovir sa 44 miliona KM. (izvor: <https://www.akta.ba/>)